


ESH-1

G. 40



SANDER GERA

**KANGĒ  
A GIMESH**

88/883-1

15

G 40

SANDËR GERA

# KANGË AGIMESH

SHKOLLË E SHTETIT  
DURRES

45750

12343

SHTËPIA BOTONJËSE «NAIM FRASHËRI»

PËR TY,  
KANGË SHQIPTARE!

O kangë e madhe e tokës shqipëtare,  
derdhi mbarë strofat tueja  
nëpër dritë,  
që vargjet rreze,  
Atdheut madhninë,  
lavdinë  
gjithnjë me i rritë.

Nuk jem' të vegjël n'siujdhezë të lashtë.  
Me kangë në buzë  
me hutë në dorë  
luftuem,  
gjithmonë balozat i dërmuem,  
i shporrëm,  
me gjak dëshmorësh historinë e shkruem.

Vitet kalojnë të ndezta  
n'dritë t'lirisë,  
o kangë e madhe, e gdhendin përmendore  
të socializmit n'tokën arbënore.



Gdhendin buzqeshjen e fatbardhësisë  
e njajo dorë  
që dje  
vorroi skllavninë,  
për ty, kangë, voton sot — për lumtuninë.

SHQIPJA  
ME  
SHQIPET

Kallxit e artë,  
o Shqipe, t'kanë rrethue,  
pranverë e begati s'janë veç në stemë,  
me Yllin  
që të ndrit tue vezullue  
dritën e madhe në atdhe na kemë.

Madhninë burrnore shekujt ta kanë njohë  
tek dilte n'sheshe farfuri e zjarr...  
Shqipe,  
me flatrat tueja prorë ke ngrohë  
liritë kryengritse —  
popullin shqiptar.

Sygacë n' stuhi,  
n' tufan e gjallë përhera,  
puplat e krahve rreze dhe shigjetë —  
për ne dritdhanse, për anmikun tmera.

Me gazin tonë  
e qetë mëkon foletë,  
me zjarrin tonë  
kufit' vëzhgon pa frikë —  
Shqipja me shqipet s'dron kend,  
Republikë!

DITARIN  
QË SHKROVE  
NËPËR MALE

Ditarin tand  
që n' male pate shkruë  
e prunë nji ditë nandori në qytet.  
Atdheut  
në dorë ja hodhën fletë e fletë,  
me lulet e fitores  
erë me lshuem.

E vitet rrodhën...  
Ato fletë t'përgjakuna  
u ruejtën në të kohës kalendar.  
Çdo ditë  
ndër to këndojmë nga 'j varg andrrimi  
që ndër duer tona  
ta shndrojmë n'pishtar.

Buzqeshin malet  
që ta falën zjarrin,  
buzqeshin shokët  
që ta panë lavdinë,  
e kangëtarët që në flijen tande  
gjejnë vargjet ma të bukur  
për lirinë.



ÇASTE  
NGA DITARI  
I NJI PARTIZANI POET

1.

Mirëmëngjez, Atdhe!  
S'të pash' kurrherë  
kështu nga shkambi ku mer hov shqiponja!

Sa do gëzoja  
me puhiza t'ambila  
ndër këto çaste zemrën ta shëroja!  
Si ti e kam zemrën plagë  
e helm kam buzën,  
por do luftojmë, nga gjokset me t'i flakë  
anmiqt  
që kot tërhuzen.

Erdhi dita  
me t'hjekë nga shtati zgjebën,  
skllavëninë,  
me krahët luftëtarë me rrokë lirinë.

2.

«Shok partizan!» — më thirri komisari...  
E para herë  
që ndjeva emnin tim  
n' apel të ri ndër male.  
Sot shqiptari

n' këtë emën gjet forcë e bashkim.

Unë nuk e dija  
se do m'ndizej gjaku  
për emnin  
që këtu, të gjithë, njëlloj e kishim,  
as nuk e dija se si i riu e plaku  
dy strofa t'njajta /  
të një kange ishim.

Nuk ndodhka ndryshe  
dersa një Parti  
njëlloj të gjithëve na e ndez zjarrin n' gjë.

3.

Ti, shok, po pastron armën.  
Mirë, pastroje;  
unë po mpreh lapsin, dëshiroj me shkrue.  
Asht e vështirë  
thellë guve me këndue,  
por ja,  
pa kangë unë ditën s'mund ta mbyll.

Sot që shumë ngricë.  
Der buzët na u ngrinë akull.  
Atje nën kreshtë nuk duhej kanga,  
syni  
duhej të mprehej. Pozicioni ynë  
ishite shënjestër për të tanë këtë pyll.

Andaj kam t' drejtë ta shkrij unë andrrën  
time

në kangë këtu  
ku ti lehtë buzëqesh



e m' shikon fshehtas...  
Jo, nuk të gënjej,  
s'më jep dashnia sonte frymëzime,  
nji tjetër frymëzim po më çon peshë:  
vetë arma jote që pat aq mirë shenj...

4.

Unë nuk po strukem në vetmi të shpellës  
me ikë nga ju.  
Më falni, mos m' qortoni,  
a nuk i shihni sytë e mi sa thellë  
diçka po ruejnë? Asgja ndër ta s'hetoni?

Nuk di çfarë asht ditari i stërholluem  
i shkruem n'albun bojë ar,  
unë njoh shkambijet:  
n'ata due me shkruet  
eposin tonë —  
eposin legjendar.

Pra mos m'i hidhni sytë për t' më qortue,  
me ju e kam zemrën,  
gishtin për luftim,  
por kam dhe kangën për ju me këndue:  
— Përpara, shokë!  
Përpara me guxim!

BALLADË  
PËR DITËLINDJEN

1.

Në kreshtën e malit, te kroni i dëborës,  
me tre shokë ai ishte i rrethuem.  
Bajonetën e pamprehun e ngulte n'ahun  
vetmitar.  
Me zor i jepte dorës  
aty  
nji datë tue shkruem...

2.

Me tre shokë ai buzëqeshte:  
— të pijmë këtë ujë dëbore,  
se sot  
nji vit po mbush  
qyshse erdha nëpër maja të thepisuna,  
me ju,  
Atdheut e ditëlindjeve të ardhëshme  
t'u çelim n'histori të lavdishmin kalendar,  
kalendarin e lirisë! —

Me tre shokë ai buzëqeshte:  
— Sot, o shokë, unë njoh ditlindjen time,  
që zu fill në djepin e Nandorit.

3.

Në kreshtën e malit, te kroni i dëborës,  
me tre shokë ai pat luftuem...

Çdo krizëm arme qe gojë urimtare, —  
për ditëlindjen

gjithkah kreshta pat gjëmuem.

Çdo krizëm arme qe një flakë shejtare, —  
robnive

u digjte fletë ditëlindjesh

në të ndytin, shekullorin kalendar.

Çdo krizëm arme

për annik çelte një varr.

Në kreshtën e malit, te kroni i dëborës,  
me tre shokët ai ra tue luftuem...

Atë ditëlindje, të skalitun,

ende ruen ai ahu vetmitar

në kreshtën e malit, te kroni i dëborës...



NJI DITË  
E LARGËT NANDORI

Rreptë me kamxhik murrhani kërcënonte.  
Kahdo  
vdekja përgjonte  
në pusi,  
me bajoneta t'akullta fashistësh.

Si lecka  
bashkat e reve sorollaste era  
e flamujt e Atdheut t'dhunuem mbërdhinin  
shtang  
varë ndër shtiza e nëpër balkone.

Atë natë,  
nji derë u çel n'rrugicën time  
e doli flakë — Marathonomaku...  
Qyteti u mbush  
me traktet e Partisë.

....  
Kur duel mëngjezi i ngritë,  
shqipet robnesha  
ikën nga zgjedha e spatave  
t' Liktorit  
me u kapë ndër supe t' partizanëve  
për t' valavitë  
buzqeshjen e Nandorit.

Qysh atë ditë  
dëgjoj fërshllime flatrash  
tue ardhë t'hareshme përmbi kangë të mia...  
Vargjet  
vërshojnë mbas tyne  
si ushtarë,  
për çdo betejë që lyp Atdheu —  
Shqipnia.

II.

BIBLIOTEKA E SHKENCË  
GJEROKASTER

43750

12343



BUZËQESHJE  
NË SHTËRGATË

*...Do të fryjnë erëra nëpër dete dhe  
detarët tanë do të këndojnë këngë  
për kapedanin Adem Reka...*

Kangës për ty nuk dija fill me i gjetë,  
o bir i detit!

Jo kurrë s'mund të jetë  
aq e fuqishme kanga sa duert tueja,  
që shtrënguen muskuj cimash ciklopikë,  
kurrë strofat s'mund t'bashkohen  
tubëz,  
si u mblodh vullneti yt n'zemër kreshnike.  
As munden rimat me u përputhë të qeta  
ashtu si vdekja  
t'u përputh te jeta.

o

...ti erdhe zog shqiponje bigash s'malit,  
prune me vete buzgaz yllin n'ballë,  
kangën plot mallë

në buzë të rreshkuna,  
në sy  
kaltërsi deti,  
në gji  
zjarr'n e pashueshëm t'dashunisë.

o

Kishe hy n'jetë  
si trakti ndër koliba, —  
fjalën e parë në zemër t'shkroi liria,  
të dytën fjalë Partia n'triskë ta gdhendi,  
të tretën  
ti shtërngatave ua ngjeshe,  
deri që u ngrite mbi dyrekë të kohës  
flamur  
me valavitje të përjetëshme.

o

Atdhe,  
sot uli buzët mbi ballë të heroit,  
merr ngrohtësinë,  
mer zjarrin e asaj zemre gjeraqinë,  
hidhe mbi kazma e mbi pushkë shqiptare,  
që forcat luftëtare  
tue ça drejt socializmit ballënantë  
të kenë pranë kangën e herojve tonë —  
të ndritunën buzqeshje n'çdo shtërngatë.

RAPSODI  
E MALEVE TONA

Ajo u ngjit e qetë te shkambi  
që naltohej mbi lëndinë,  
hodhi sytë përreth, zhgjetues,  
si ndrit rezja e parë n'mëngjez,  
pastaj lehtë e nxori fjalën  
që muer hov dhe e rreptë u ndez.

Nuk ish fjalë, por ish buçimë, —  
ishte flakë e krahanorit  
që po digjte para popullit  
trashëgimin e errësinës,  
ishte kangë që zgjonte malet —  
borizane ndër agime.

Atë mëngjez, shtatmdhjetë pranverat  
që lulzonin n' trup të saj,  
ishin plot shtatmdhjetë shigjeta  
kundër turpit që lanë motet,  
ishin duer revolucionit  
që po grisnin mbarë kanunet  
e përçuduna n'malsi.

...Para nesh u thyen mbarë djepat  
e fejesave të mituna,  
para nesh u flakën qeset  
e shitblemjes shtazarake,



para nesh shkëlqeu liria  
që kish mbetë ndrydhë n'zemra vashash,  
doli n'shesh me flakë zharritëse  
tue coptue veriga dhune, —  
shkëlqeu sytë e rinisë sonë.

Ajo fliste n' shkamb-tribunë  
me fuqinë e dashunisë,  
ajo shuente qirij tempujsh  
me ikona mesjetare,  
ajo çonte nalt «Raportin»  
për lulzim kooperativash,  
përshtëndeste brohoritëse  
për epokën e Partisë.

E herë-herë, si t'u krenonte  
me atë madhni malesh të lashta,  
fill kah majat çonte dorën,  
e na, t'heshtun, mirë dëgjonim  
t'thellën kangë të grues shqiptare.  
Ishte kangë-zjarr heroinash,  
ishte kanga e grave t'Shalës  
që n'log burrash po buçiste  
tue shpërnda strofat zharritëse  
mbi fantazmat e errësinës,  
ish poema ngadhnjimtare  
e Partisë gjithmonë fanar.

...E u largue.

Ajo shkoi, gjyqin t'vazhdonte  
atje n'rrugë t'Malsisë së Madhe, —  
gjyq i rreptë kundër s'kaluemes

që i la mbyllë shtigjet malsisë.  
E me shoqet në një tufë,  
tue çue kazmën nëpër gërxe,  
zu me çelë rrugën e gjatë,  
që do ndrisë në gjoks të maleve,  
si ylber, me gaz t'rinisë.

## TUFANE QË PËRLAJNË ERRËSINËN.

### 1.

... e vitet rodhën si bie ujt e shiut,  
atdheut  
plagët ja shndoshën, gjoksin ja rinuen.  
Ke andje me ndejë votrës  
ku dikur  
strukej liria e heshtun tue përgjue,  
ke andje me ndigjue  
të zjarrtën rrjedhë të fjalëve  
të Tomë Dedë Nishit,  
luftëtarit t'maleve.  
Ai buzëqesh me gazin e kreshnikëve  
kur,  
tue kuvendë, kujton lavditë e moçme  
të hutave kryengritëse:  
— S'na frikësonte kurrë  
asnji taborr.  
Porse... robninë  
jo nuk e zhgulëm në çdo krahnor,  
na la mjaft terr ndër fletë kanunesh  
e...huta jonë  
u donte me i zharritë,  
me ua zhdukë farën, thellë me i futë në  
vorr. —



2.

Lugetën e kulçedra  
s'ka pasë kurrë malsia.  
Po kish në votër dhimbjen e urinë,  
ndonse kish zemrën pasuni të rrallë.  
Këtë zemër  
e vu n'shenj përçuesi i territ  
e la t'robnueme me vargojt e «ferrit»,  
i mori pa peshue djersë edhe gjak  
«me mbetë gjithmonë ma i dlirti  
tip autokton  
i racës s'lashtë ilire» — i racës sonë... —  
E u shtrua kuvendi mes «shejtnorve t'tokës»  
edhe herojve të legjendës s'misrit:  
— Ti çveshu, m'dorzo çelsat e lakmisë,  
të begatisë  
që rrëmben zemrën për mkatnim e dhunë,  
dhe unë  
që ty të ruej nga grackat mëkatnore  
do t'jap një skutë ku e don,  
n'vise qiellore...  
Libri s'të duhet, nxihet nga bishtuku,  
libri ma i mirë asht shpatulla e bagtisë:  
aty lexon inadet e kojshisë,  
n'daç se ç'bajnë krajlat nëpër botë —  
shpatulla e mirë  
të gjitha ty t'i thotë...

Jo, s'kish lugetën kurrë malsia jonë,  
kish fole skrapthash me gjuhën plot helm.  
Tradhtia  
s'kish brina tjera,  
as tjetër bisht nuk kish ma t'zi,

si dredhëz t'i përdridhej  
kreshnikes racë, në zemër thellë me e gri.

3.

Unë desha kangës t'i jap flatra tjera,  
nuk desha strofat me blozë me zhigatë,  
por ja,  
se vargjet shtyn revolucioni  
me hy kudo —  
ndër skutat e ndër sheshet,  
fytapërfyt të ndeshen  
me t'vjetrën botë  
që bie rrokoll si ma e kalbuna rrotë  
e historisë.  
E n'qe se hovi kangën  
e çon n'zona malore  
ku, me pranverën, lulet e Kongresit  
kullat zbardhojnë e shpirtënt ripërtrijnë,  
atherë  
le të buçasë kjo kangë si borizane,  
që komisarve t'dritës s'madhe  
t'u jetë përshndetje brohorie  
për t'ndritunat agime, — e pope  
të gojëzjarrtave lahuta,  
që rinojnë zemrat në malsinë e re.

III.



## KUR LINDA UNË...

*tue ndigjue nji kangë afrikane*

1.

Kur linda unë  
më pagëzoi nji diell i nxehtë  
si prush,  
m'përkundi djepi varë ndër dega palme,  
porsi një kolovajzë,  
e vajin tim nuk e ndigjoi askush.  
Kur linda unë  
atdheu  
po ndrydhte n'grusht tufane...

2.

Kur linda unë  
ninullën nana ma këndoi t'trishtueme:  
— Flej, loçka e nanës, flej!  
T'u bafshin krahët bajoneta  
me ça në parzëm thellë stuhinë!  
Andrrat e bukura  
shpëgamim t'u bafshin, zjarr herojsh! —  
Kur linda unë

ai djep  
ish plagë në zemër të Afrikës...

3.

Ai djep i mjerë!  
Shumë larg, larg sot dallohet,  
krejt i shkatruem, skelet i fëminisë,  
n'sa ti, atdhe,  
ende po drydh në grusht tufane,  
si atherë  
kur linda unë.

4.

U dashka prap,  
u dashka prap me ecë  
përgjatë kurrizit t'këtij shekulli,  
tue mbajtë në dorë vravashkën rrezatuese,  
fytyrën me ta ndritë,  
o nanë Afrikë!  
U dashka prap, u dashka prap të shohë  
skllavnja  
se lakun ke këputë,  
lirisë  
me i dhanë fuqinë e krahve t'bijve tu!  
U dashka prap,  
u dashka prap të dridhen  
flatrat  
e krejt mënisië sonë afrikane  
e sot,  
që u rrite ti  
dhe unë,  
Afrikë,  
me derdhë rrëke vërshime dhe tufane.

POEMA  
E BUZËQESHJES  
QË NUK VDES KURRË

pionierit vietnamez FIEN DIN

1.

Ai  
kangët e Vietnamit  
i kish armë.  
I mbushte plot e plot  
me duf mënie  
t'i flakëronte nëpër orizore.

Kur qeshte  
për luftarët ish si rreze pranverore,  
kur heshte,  
gjithkush do priste kangë stuhie.

2.

Buzagaz ai doli nga llogori.  
Kangët  
hodh në prehën të luftarëve,  
me vete muer do fiye shkrepse n'trastë, —  
nji duf të zjartë  
në krahanor.



3.

U nis i qetë...

Me sytë porsi shigjetë  
pusitë e natës i përgjonte.

Shkliste

mbi gjemba istikamesh lehtë e lehtë.

Andej dremiste

në pyll

kuçedra tue ngrohë barutin e çfarosjes.1)

4.

Atdheu ja ndiqte gjurmët n'errësinë,  
i pëshpëriste...

N'atë krahnor fëmije  
lypte një shkrepëtimë, —  
një armë lirie.

5.

Kush nuk e pa  
kur hovshëm trastën shkjeu  
e ndër turij kuçedrës  
shkrepsen ja vërviti...

Një gjamë e tmershme n'pyll shungulloi.

---

1) Fuçitë e benzinës për aviacionin.

6.

Atë natë  
dora e lirisë  
në parzmin e Vietnamit  
thellë skaliti  
buzëqeshjen e pavdekshme  
të një femisë.

ME KANGË TË FRESKËT  
MALESH LEGJENDARE...

Mbi shkollën time, përmes ahash,  
muzgu  
me krahë të shtrimë  
zbret malit hijerandë.  
Qetsinë e malësisë shqiptare  
e mbushin zogjtë  
kah turren nëpër landë  
me gushat e dalldisuna kangtare.

Për pak  
vetmia më përpin ndër joshje,  
kaluen voglushët, me ta hymni i ditës,  
mbi banka lanë fletoret e hartimit —  
të mbyllunat petale të andrrimit.

E dija  
se mbrendë tyne flakuronin  
tema t'ylberta,  
kangë e fluturime, —  
skica  
për t'ardhmen e malsisë,  
plugje vigane,



hove ciklopikë  
nën dritë të diellit të Shqipnisë  
kreshnike.

E dija  
se çdo radhë ish zemër kombit,  
frymë revolucionit,  
që po shpluhnos t'kaluemet e malsisë.  
fuqi lavdie  
për fitore agimesh,  
për socializmin shtyllat e betonit.

E nga kjo shkollë e largët  
mbarë dheut  
iu fala  
i buzëqeshun me plot kangë të heshtuna,  
që, si fletoret, lule t'para planesh,  
prisnin  
shpërthimin n'dorën e Atdheut.

2.

Ra nata e qetë...  
Gazetë,  
pse po më dridhesh n'dorë,  
pse, kangë, më djeg në krahanor?  
Tej horizontesh...  
atje në Vietnam  
u dogjën sa fletore  
andrrimesh  
e dëshirash fëminore.

E mue, që sonte doja  
t'andrhoja

me i nda hartimet e voglushave  
n' makete,  
sonte më del n'vegim  
mësuesi Nam  
në klasë  
me sa e sa hartime t'djeguna,  
të përgjakuna  
atje n'Vietnam.

3.

...O motër Truong Thi Vi, shtrije atë  
dorë  
tej horizontesh, na jep vizatimin  
e vllaut të gjorë,  
voglushit Truong Van Dan.  
Na i jep t'i shohim jeroglifet  
e jetshkurtuemit piktor t'ardhmënisë, —  
t'atij njomzaku,  
që u ba lule gjaku  
me stolisë  
krahanorin e lirisë.

E ti, Nam,  
o shok mësues, aq zemërvramë,  
hapi fletoret që bomba përflaku,  
copat e grisuna t'hartimit  
t'lidhim  
me dashuninë e popujve hakmarrës.  
Hapi  
t'i vemë në ballë të kohës sonë  
shkrojat e djeguna: t'lexojë njerzimi  
dënimin ma t'fuqishëm për mizorët.

Kufomat  
që u dërmuen n'gërmadhë të vdekjes,  
do lulzajnë prap,  
Vietnami i kthen ndër flamuj  
në ballë të luftës çlirimtare,  
Vietnami i kthen  
ndër ma t'shejtat altare  
prej kah betimi merr cak për shpagim.

4.

Mbi shkollën time, përmes ahash  
muzgu  
me krahë të shtrimë  
kaherë ka zbritun hijerandë.  
Në çdo shkorret  
e në t'madhnueshmet landë  
nji erë e lehtë  
pëshprit me qetësinë,  
që dalngadalë po ve në gjumë malsinë.

Tubë mbledh hartimet —  
andërrimet  
e bindjet guximtare,  
e sonte, o Vietnam, unë përshëndes  
me to, së largu, Huong Fukun e djegun.  
Unë përshëndes  
atë përmendore, stolisë  
hartimesh të përgjakuna  
të zjarra,  
që do pikzojnë lirinë me shkronja të arta,  
e t'zezat epitafe t'mizorisë.



IV

TRANDAFIL I KUQ  
MBI SHKAMB

Te kasollja vetmitare  
drita e zbehtë përshkoi frangjinë...  
Ajo dritë, sapo lanë kreshtën,  
qe si busull n'errësinë.  
Mezi u ngjitën të njëzetët  
te kasollja dor për dorë,  
tue kalue rrpinin e qafës  
sa e sa herë rrshqitën mbi borë.

. . . . . : :  
— Bujrum t'gjithë! Banesën time  
për të madhe mos me e lypë,  
por do e ketë një votër zjarri  
e një sofër bukë e krypë.

I.

Kush s'jeton ndër malet tona  
e nuk njeh pllaja e lugina,  
kush nuk ndalet pranë ujvarash  
a s'kënaq sytë nën çetina,

kush nuk njih kasollen futun  
përmes gryke a buzë sinorit  
e kush s'njeh mbrend' n'atë kasolle  
t'madhen zemër të malsorit, —  
unë do thosha s'ka shijue  
aq mirë jetën shqipëtare,  
por ka mangut një strofë t'kangës  
sonë kreshnike legjendare.

Micol Gjini hijerandi,  
fjalëpakti plot urti,  
u shtroi sofrën partizanëve  
me të rrallën bujari.

Shota, e bija, shtatpinjolla  
u shërbente s'ka ma mirë,  
nuk kish fjalë, veç buzëqeshje —  
syni i saj rreze e dliërë.

— Hani, burra, jeni t'lodhun!  
s'kemi kohë për shumë kuvend,  
do të fleni e pa dalë drita  
do gjejmë dalje nga ky vend.

— Micol Gjini, t'u rritë ndera  
e t'u shtoftë kulmi i shtëpisë,  
prorë ja shtrofsh sofrën bujare  
krushëqisë e miqësisë!

Po Micoli ngrysi vetullat,  
shpejt s'i ktheu fjalë komisarit,  
hodh në zjarr ashkla, dhe flaka  
u vërvit drejt kremastarit.  
Kushedi pse i dha hov flakës,  
ndoshta donte flakërime  
që të shihte... Eh, moj zemër,  
nuk asht lehtë me mbartë kujtime!

— Partizan, — foli Micoli —



t'u rritë ndera ty me shokë,  
 por urimin që ma bane  
 nuk po dij si me ta pritë,  
 se ky kulm, or bir i dashun,  
 asht këputë, kurrë mos me u ngjitë...  
 Nji djalë kisha. Edhe vajzën,  
 këtë të mjerë unë e fejova,  
 nuk e pyeta asohere,  
 vetë me duer keq e verbova.  
 Iu nënshtrova, pra, zakonit,  
 e fejova qysh në djep...  
 Eh, zakon aq i përçudun,  
 me shitë baba fminë e vet!  
 Miku i zanun n'korb<sup>1)</sup> u kthye  
 me coftina të kërpitëj...  
 Nuk e desha hije-zezën  
 mbas të huejve bisht të ngjitej,  
 E dëbova dhe e përbuza,  
 ai... ma thau konakun tim,  
 ma vrau djalin... por e vrava.  
 Kjo kasollë s'mban poshtënim.  
 E kur thellë kishte ra heshtja  
 në kasolle, prap Micoli  
 e çoi kokën:

— Moj lum bija,  
 shpejto pak, se drita doli!  
 Shtro postahet, janë lodhë trimat,  
 e ti brof shpejt pa ague,  
 miqtë përcilli kah ahishta  
 shtegun tonë me ua tregue.

---

1) Milic

## II.

Edhe pak do zbardhin kreshtat,  
do t'i japin borës dritë,  
do ta zbusin ndoshta erën  
uluruese që të fshikë.

Partizanët kaluen qafën,  
me të shpejtë ja dolën pllajës  
që t'i zente rrezja e dritës  
mu në zemër të pyllnajës.

Era e rreptë aty nuk rrihte, —  
nëpër aha qetësi,  
dy gisht bora kish randue  
nëpër degë e i kishte ngri.

Shota printe e shkathtë si dreni,  
herë e ndalte hovin turr,  
e pa fjalë, e qetë ngatrruhej  
ke ndoj stom e ke ndoj curr.  
Se çfarë shihte dhe ndigjonte  
mes të mugëtit që zdritej!  
Po prap hidhej buzëqeshun  
e me ngut shtegut i ngjitej.

Drita zbardhi. Por kund dielli  
nuk shkëlqente përmbi mal,  
përsëri Shota, sa u futën  
mbrenda pylli, hovin ndal.  
E u tregon:

— Këtu ahishta  
ze dendsohet der atje,  
do ta shihni se çfarë shpelle  
ju hap rrugë, n'male ju shpie.  
Partizanët ndigjuen vajzën  
që aq bukur fliste e qetë.



Ajo rrinte para tynë  
si një flutur krahëletë,  
malisherin mbante lirshëm,  
si mos t'kish ai vdekjen n' grykë,

Partizanët tue pushue  
tresnin mendjen plot shqetsimi..  
tej dy kodrash, tashti shokët  
duhet t'i ishin n'udhëtim.

Kishin plaçka e të plagosun  
e të mardhun nga ky t'ftohtë.

Sa dëshronin aty t'ndiznin  
flakadaj, të gjithë me i ngrohë!

Shota e shkathtë tue i dhanë krrrelit  
që mbi ballë i kishte ra,  
sytë i hjedh m'hartë t'Lirimit  
e tue folun lehtë, nën za:

— Komisar, mos shiko hartën,  
nuk tregon për shtegun tonë.

Por të brofim me zanë grykën  
sa nuk jemi ende vonë.

\* \* \*

Tue ecë ngutshëm pararoja  
asaj gjurmët po ja ndjek,  
pylli i qetë herë-herë gjëmonte  
tek e zgjonte ndoj ortek.

T'ngritën borë, trokal të bardhë,  
asnji gjurmë s'e kish përlye,  
nata e egër edhe bishat  
nëpër strofka kishte ndry.



Po çfarë pa Shota që shtangu  
e çoi dorën për t'u ndalë?...  
Barkas ranë të gjithë, e vajza  
barkas erdh te ata ngadalë.

— Kem' pusi. Gjermanë te shkambi.  
Nuk lëvizin... si statuja...  
Si t'ja bajmë? shtegu i kalimit  
na ka ra ndër duer të hueja!

Për pak çaste kush nuk foli...  
Mandej urdhën jep Lirimi:

— Mbas çdo ahu një luftar.  
Do ta jap shenjin e luftës  
me të shtime unë ma parë.  
E ti, Shotë, mos rri ma tepër,  
shpejto, rrugën e gjejmë vetë.  
Ti për ne të jesh lajmtare,  
kërko shokët që vijnë sot,  
t'u tregosh se pararoja  
s'u del para, s'mundet dot...  
S'do i turpnojë e do çelë rrugën  
me brigatë për t'u bashkue.  
Shotë, tregoj se Partia  
ndër dragoj na ka shëndrrue.

— Komisar, — ja priti vajza —  
unë s'kam ardhë me ju t'shetis...  
Luftëtarët e lirisë  
ndër rreziqe nuk braktis.

— Ndigjo, shoqe...

— Mjaft ndigjova,

këto fjalë nuk janë për mue.  
Komisar, Shota e Micolit  
në rrezik s'din me u dorzue.  
Batalioni do e gjejë rrugën,

po e pret tata at kaherë...  
Por vështro: ja, matanë shkambit  
po ndigjohet nji poterë.

— Partizanë, shpejt dorëzonju,  
ma mos prisni, kot e keni!

Mbas nji ahu, ku vren Oci,  
del përgjegja si rufe:  
— Komunisti nuk dorzohet,  
s'e zhidat yllin e tij,  
por rri gati e prit dënimin,  
prit nishanin për tradhti.

### III

Pyll, o pyll, a po e ven veshin  
të ndigjosh ç'vlon në gji tand?  
Shkundi degët ngri nga mardha  
e viganat aha trand.  
Ti e di mirë, se luftëtarët  
ndër landë tua patën cak —  
për t'i kthye ndër lapidare  
me na ruejtë të shtrejtin prak.  
Ti e di mirë... Ti vetë dhurove  
trupat tu me i ba lahuta,  
të këndohej kanga e madhe  
si me gojë, ashtu me huta.

. . . . . : :

Partizanët janë shpërnda,  
kanë zanë ahat shekullorë,



qesin rrallë, që plumbi i çmueshëm  
të godasë veç krahanorë.

Shota e gjuen tytën e sharrsit  
që si gjarpën, shlligë e zezë,  
e gjuen drejt... Sa dëshironte  
mu në gojë thellë me ja ndezë!  
Por i rrepti tik-e-takun  
s'e pushonte asnji ças,  
herë kah vajza, herë drejt ahash  
partizanët t'i godasë.

Ja, si u çuen tri bisha t'egra  
me mashinka tue vjellë zjarr,  
e kah pylli deshën turrin  
si shigjetë të tre me marrë,  
por... të parin këput Lami,  
tjetri u lkund prej Çun Frashnjarit  
edhe i treti palmuç mbeti  
nga një bombë e komisarit.

\* \* \*

Tue luftue dita po shkonte —  
aq e shkurtë n'dimnin mizor,  
të njëzetët ndonse t'lodhun  
nji llogor grryenin në borë.

Sulmi pritej herë mbas here,  
po gjermanët po ngurronin,  
ndoshta prisnin tjera forca  
ndoshta natën me pritë donin?

Vren Lirimi e fort mendonte  
si t'ja dilnin me fitore...  
S'kish udhë tjetër, — heroizmi  
mund ta mirrte atë shkamb bore.



— Shotë, thirr Ucin e Vuksanin,  
të ruejnë anash Celi e Lami,  
tjerët gati, e të hidhna  
për t'u kapë deri te shkambi.

Gjashtë vet' janë e me ta vajza  
që pa urdhën u hodh turr...

Ata s'ndalen prej breshnive  
që flakron i tmershmi curr.

— Ti, Lirim, s'e dashke jetën  
ke i bje drejt udhës pa frikë?  
a s'ndigjueke fishkëllimat  
që lëshojnë automatikët?

Trimat s'ndalen, për rranzë shkambi  
u afruen e... të përgjakun,  
por Vuksani barkas mbeti  
t'mbramen bombë s'mundet me flakun...

Vall ç'e gjet?... Nuk pyetet trimi  
kur në luftë asht ba furi.

Eh, moj zemër shqipëtare,  
kurrë dënesa nuk t'u ndi!

Të lumtë, Shotë, o lule e egër,  
aq e bukur në malsi,  
të lumtë vajzë, se sot e binde  
tek mësyn gjarpnin e zi.

Të lumtë vajzë!... por ule dorën,  
gjarpni asht gati me kafshue.

Kqyr si e sjell gojën kobare  
të furishme me t'gëlltitë...

Oh, mjaft kangë! këpute strofën,  
mos më len ma me soditë!

Ma hiq vargun që don t'futet  
plot me gjak në rrjedhën tande,  
ma hiq fjalën e kumtimit  
me ndie kob nuk po më kande.

Po ti s'pyet. Luftarët hovin  
ty ta ndezën pak nga pak,  
tash këndo, pra, se edhe Shota  
vargun tand e lau me gjak!

\* \* \*

Tue ra nata, batalioni  
po shpejtonte n'pyll të zi,  
n'atë udhë bore Micol Gjini  
fort me zor i kishte pri.

Qëndro, burrë, si ke qëndrue  
kur të vetmin djalë ta vranë,  
kur ty kulmin e kasolles  
lik përgjysë përjetë ta ndanë!

E ju shokë të batalionit,  
prisni pak që të pushoni,  
udha e gjatë fort ju ka lodhun,  
prisni pak e do shikoni...

Pararohen partizane  
nuk po e gjeni me tregue  
se për n'mal, ku pret brigata,  
asht i lirë shtegu me shkue.

Partizanët po ngarendin  
mb'shpinë t'zbuluesave gjermanë,  
që kanë lanë armë edhe plaçka,  
e të vramë n'llogor kanë lanë.

Por ju pret këtu lavdia —  
bukuria e kreshnikisë:  
do ta gjeni t'qetë Vuksanin  
bashkë me Ucin, bij t'Partisë,  
do ju ndrishi trandafili  
maje shkambi — lulja e re,  
Shota e bukur, me tregue  
se sa i shtrejtë je, o Atdhe!



## TE PYLLI I SHEKUJVE

1.

Fol me mue sot,  
si fole n'heshtje dhimbje  
me kufitarin, burrin tand të vramë!  
Fol e më thuej  
sa pate, nanë, sa pate idhënime,  
sa pate dhe sa pret në jetë gëzime.

A nuk shikon?  
Yt bir përpara teje buzëqesh.  
Nesër udhtoj  
drejt atij pylli, ku tash disa vjetë  
im at' vdekjen e gjet.  
Yt bir po shkon me çetën e rinisë  
me zhdukë plagë tjera në krahnor  
t'Shqipnisë.

2.

Madhni malesh, pyjesh e luginash,  
lavdinë tuej unë kam ndigjue qysh ndër  
ninulla.  
Syve të mi dëshrakë  
me qinda iu shpalosën pamje t'rralla,  
thesare  
zhytë ndër guva vetmitare...  
Por unë, që u rrita me kangë djepi t'idhun,



e njoha anmiqt edhe tradhtinë  
ndër plumba që m'rrxuen atin,  
por unë...  
eh, si nuk mundem dot  
me lidhun  
ma t'idhtin mot,  
që pata,  
e me e zhidatë ma zi se nata  
këtu në pyll  
ku sot  
flamuj e hove zemrash jem' tue shtillun.

3.

Mos më gjykoni si të dehun ndër frymzime,  
poet  
unë nuk kam qenë, — kumbime  
s'kam dijtë me gjetë.  
Por s'qenka lehtë  
me kalue shtigjesh, ku një ditë  
im at'  
gjurmoi tradhtinë bash këndeje pari,  
me i çelun shteg buzqeshjes sonë rinore.

Ju vetë,  
shokë e shoqe të aksionit,  
ju vetë të gjithë po baheni poetë,  
po e gjeni kangën  
aq të bukur e aq të zjarrtë  
kudo,  
edhe në qilizmin e atij shpati.  
Po unë atherë  
a nuk do e gjej te kjo muranë  
në zemër të pyllit

që përgjon aq hijerandë  
kohën,  
që shkoi,  
kohën,  
që vjen me t'mirat e lirisë,  
që na rriti, na dha qumështin  
e dragojve,  
na dha forcën e herojve?

4.

Mos më qorto, o at'  
kah po vi i buzëqeshun  
në këtë pyll të reshun  
më kaçuba e aha shekullorë.  
Unë vdekjen tande nuk e njoha, at',  
kur qesh në djep  
ajo  
më thanë, kaloi pranë meje si ma e zeza  
natë,  
po s'frikësoi buzëqeshjen e fëmisë.  
Ajo m'kaloi...  
S'e di.

U rrita  
si trandafil nën rreze që lshon drita,  
nën rreze t'jetës që përgjonte  
hapat e mi, —  
mëkonte  
kangën kreshnike, që ti le këtu  
në malësi.

Të njoha, at', ma vonë  
si njoh lirinë,  
si njoh andrrimin tonë,  
si njoh dritën e ajrin,

dashuninë,  
si njoh agimin kunorë mbi Shqipninë.  
E m'jepet me besue saherë,  
se ti do jeshë n'këtë reshje rrezesh,  
në të madhnueshmen bukuri mëngjezesh;  
se ti do jeshë  
në kangën e Partisë  
që strofat e fitorevet i shton  
çdo ditë  
n'poemën e rinisë  
që vlon në gjakun tonë.

Andaj shkëndinë  
që flakron zemrat tona  
s'e shuen dot  
asgja.  
Unë mallëngjimin sot  
dhuratë  
s'e pruna para teje, at',  
nuk e pruna të largtin lot të nanlokes,  
por, bashkë me shokë, tjetër dhuratë  
po qes:  
njatë kangë që n'zemër t'u plagos  
e që u përtri në zemrën e tand biri.  
Kangën e tokës  
prumë, me i shtue fuqinë  
dorës puntore  
që mban agimet n'tokën arbënore .

5.

Na  
Kemi ardhë të armatosun deri n'dhambë,  
jo me huta dhe martina,



por me barot që mban rinia n'gji,  
kemi ardhë kryengritës kundër shekujve  
që lanë malsorin të vorruem ndër pyje,  
kemi ardhë ngarkue me andrime partiza-  
nësh

që ranë këndeja,  
ndër guva dhe lugina.  
Kemi ardhë me shpartallue  
foletë e moçme  
ku kish strofkë cubnia,  
ku fshehte thikat tradhëtia.  
Kemi ardhë me lidhë malet me male  
që barra e shpinës e malsorit  
të shkarkohet, —  
të mbesë legjendë e kohës që prendoi.

6.

...Sot pashë një vajzë.  
E bukur si një lule mali.  
Qeshte me shoqe, ndërsa lozte kazmën  
te një shkamb, që s'donte me hapë rrugën.  
Binte mbi te,  
si lshohet një tufan,  
na po e shikonim këtë urrejtje t'saj  
që kish vendosë  
atë shkamb krejt me rroposë.  
Vonë, kur së bashku, e thërmuem atë  
shkamb,  
e njoha vajzën aksioniste:  
ish një kryengritse  
e njohun në malsi...  
...Kish dalë nga laku që i kish ndrydhë  
pranverat,

e tue çue zanin me kushtrim  
kishte skalitë, me shoqe, thellë në gjoks  
t'revolucionit.

letrën e zjarrtë,  
me ja çue shokut Enver.

7.

Mirmbrama, male të hjedhta!  
Erdha fill nga puna,  
erdha ma i lehtë sikur të kisha krahë.  
Sa fort çuditëm,  
nuk dij fjalë me gjetë  
për kangën që m'dridh buzën aq me afsh.  
Sa herë  
ndër mbramje, vetmitar  
unë rrija  
e i fliste buza zemrës —  
dashunisë,  
e i thithte syni yjve zjarr  
për romantikën e thellë t'poezisë.  
Sa herë...  
Sa herë pra nuk e gjeta  
të fshehtën ambëlsi  
që na jep jeta,  
të fshehtën forcë që nxit njerzit e ri.  
Kujtoja  
se jeta vetë — kanga e vërtetë —  
ishite ndoj' andërr që zbriste qepallash,  
ndoj flakë që zbriste buzësh  
me mbushë  
zemrën e hov me i dhanun dashunisë.  
Kujtoja se zbuloja  
«sezamet» ma të fshehta andërrtare.



E nuk e dija  
se unë kështu cungoja t'bukrat andrra.  
Jeta shqiptare  
qenka ma e thella poezi —  
fuqinë  
e paska n'pyje e ndër male,  
n'çdo shkamb kala,  
në bujarinë,  
në besën e trimninë,  
që shekujt s'munden dot  
me e vra;  
e paska në shoqninë,  
që lindi e rriti lufta popullore,  
e mbi të gjitha e paska  
te bukuria e duerve punëtore.

8.

Unë kangës sime do t'i var një degëz  
nga trangu juej, o pyje!  
Ndonse ja dridhët gojën historisë  
me qitë për buzësh ngjarje plot pikllim,  
na ju deshëm, — ju due,  
ju rueni kangë që dijnë prorë me i zbulue  
fshehtësitë e zemrës atdheut tim.  
Nuk keni faj. Askurrë nuk patët faj.  
Atë vaj  
që përftuen cubat edhe bajraktarët  
e simahorët bashkë me tradhëtarët  
ju, ma të randë  
e patët në çdo landë.  
E kurrë  
ju nuk pushuet tue hekë nga trupi juej  
copat e zemrës, me i kthye ndër lahuta,



ndër çiftelia,  
t'i mbanin trimat gojë për gojë me huta  
kur flijet lypte për shpëtim Shqipnia.

9.

Po sot çfarë do këndon?  
Jo, vargu im nuk mundet dot  
me hedhë në kangë çfarë pamë e ndigjuem  
sot.

Nji ngjarje e thjeshtë —  
roman i madh,  
që e shkruen vetë jeta — vetë revolucion!  
Nji ngjarje e thjeshtë...

Nji vajzë e thjeshtë,  
nji kangë e heshtun me jehonë përpise,  
nji buzëqeshje që bie e mekun n'kazëm...  
...Çfarë pat?  
Nga dhimbja e saj buloi nji pikël djersë.

Nji ngjarje thjeshtë...

Nji vajzë e thjeshtë u smue,  
ja, mbi kurriz të maleve të lashta  
ku ende shtigjet pengojnë për flutrim.  
Rruga asht larg. E largë për katër orë.  
Për dhimbje t'saj  
nji orë asht shumë ma larg.  
— Doktor,  
na thuej ç'të bajmë? a doni krahë?  
Malit i ngjitemi porsi stuhi,  
shoqen s'e lamë, nuk e dorzojmë për t'gjallë,  
jo katër orë —  
të jenë dymbdhjetë,  
na do i përpijmë mbarë shtigjet si raketë... —

Dymbdhetë  
dolën nga radhët e aksionit,  
ndër krahë t'fuqishëm djalosharë  
shoqen e morën e u lëshuen përpjetë.  
Kaluen shpatina  
ranë nëpër lugina...  
e vajza përpëlitej n'krahë të lehtë.  
Rruga asht larg.  
Po s'ka kurrë largësi  
për t'madhen zemër të rinisë,  
për t'bukren andërr, që bulon krenare  
në dritë të malsisë.

Ata kaluen porsì kometa,  
orët i kthyen n'minutá...  
Vajzës së thjeshtë  
n'spital i shpëtoi jeta.

E unë që njoha këtë epos të heshtun,  
tue buzëqeshë  
e mora daltën me i skalitë një shkambi  
vetëm një fjalë, kujtim në këtë aksion,  
fjalën që na dha krahë:  
«R e v o l u c i o n !»

10.

O at',  
që ruen kujtimin n'lapidar,  
ma s'ke pse rrin ndër hije  
me synin strukë mbas ferrash e mbas dri-  
zash.

Kjo lufta jonë — kjo luftë rinie

që zjarr ka marrë  
me zhdukë fole murrizash,  
kjo lufta jonë  
vazhdën e mban t'triumfit çlirimtar.  
E ti,  
sogje e përjetshme, si kangë rinore,  
do na përcillish ndër aksione t'epura  
tue buzëqeshë me dashuni herojsh.  
E na,  
që shtigjet partizane ndjekim,  
për t'i kthye n'udhë t'socializmit,  
na, brezi i ri,  
për breza tjerë të ri,  
me djersën tonë do i japim hijeshi  
kalasë së madhe buzë Adriatikut,  
kalasë s'shqiponjave  
që flatrojnë nalt me zemra prej çelikut.



NGA AJO KANGË, SI VARG KRYENGRITËS,  
DOLE TI...

1.

Nga ajo kangë, si varg kryengritës,  
dole ti,  
Puthe sytë e nanave të vuajtuna,  
puthe duert e rrudhuna të pleqve  
e, mbasi shkele djepin e fejesës,  
e mhyrin mbshtolle me 'j paragraf të grisun  
kanuni,  
shkrove në ballë, me rreze drite:  
«Rroftë Partia! Poshtë errësina!»  
Të gjithë të panë  
tek bridhnje nëpër kulla e kasolla,  
tue zgjue vashat e mpime,  
tue rrëxue idhujt, ankthat, fatalizmin,  
marimangat e tradhtisë,  
e tue naltuë mbi kreshta e mbi lëndina  
të madhen zemër rrezeflakruese t'rinisë.

...Unë të gjeta kur androja  
me shkruë një dramë me dy-tri akte t'gjalla,  
e ti s'më le, ma kape dorën:  
— Me dy-tri akte nuk shkruhet revolucioni.  
Po munde gjej një stilo të fuqishëm  
që të rrjedhë bojë rrufesh zhgjetare,  
të rrjedhë rrokje tufanesh,  
me i skalitë në libër kohës së lavdishme  
të madhen dramë  
për gruen t'renë shqiptare! —

2.

Ti, shoqe, ke të drejtë.

Poetët

duhet t'i mbledhin vargjet ma të bukura  
për dashuninë e thellë të grave malësore.

Shekujt

kanë aq detyra

që kurrë s'i kryen ndaj jush.

Ju lanë në hije për me lindë durimin,

ju lanë fatzeza

me ndukë furkat nëpër skuta,

ju lanë me tjerrë,

me tjerrë,

me tjerrë

andrra të vrame, kangë të ndrydhuna,

me i shtrua postahe, me ndejë butë kanuni.

Me ndejë kleriku bashkë me bajraktarin.

E ju

tirshit papra

kryengritje t'heshtuna.

Ata s'e dinin.

S'kishin si me e dijtë

dersa tradhtia

ju mbante rob, nën roje xhebrailësh.

Nuk e besonin, se ju «kafshë njerzore»

nji ditë do i mblidhshi, me dënue motet mi-  
zore,

e për shpagim

me zhguna e çallma «të shejtnueme»,

aq t'etëshme,

do ta pastronit udhën me çue nalt kryengri-  
tjen,

tue valavitë kah majat e lavdisë shqiptare



FJALIMIN<sup>1)</sup>

e buzqeshjes suej t'përjetëshme.

3

Ti, shoqe, ke të drejtë.

Andaj sot prin në ballë t'aksioneve

si një flamur bedenash të çliruem.

Unë kurrë s'do mundem aq thellë ta ngul  
kazmën

ashtu si ti në rrugën e Malsisë,

s'e kam atë forcë me u ba qilizëm maleve

brenгат me i zhdukë,

ashtu si ti.

Ti ndoshta do më falish

krah pranë të rrij me kangën gëzimplotë,

me kangën levë, qyski.

Kushedi,

ku shpartallon fuqia jote,

kjo kangë e lindun afër kazmës sate

do mundet sadopak

me të ndihmue thellë me groposë

ligjëet e fundme të kanunit t'dhunës.

E unë, poeti,

që vargje tjera prap kam për t'burue,

për bukurinë plot zjarr t'kryengritjes sate,

po i la këto shpërthime

n'dorën tande.

Dëshroj

t'i kesh të mprehtë si teha shpate.

---

1) Fjalimi i 6 shkurtit 1967 i sh. Enver Hoxha.



BIOTEKA E SHËTËRIS  
GJYRKASIT

43850

PËRMBAJTJA

I.

Për ty, kangë shqiptare .....	5
Shqipja më shqipet .....	7
Ditarin që shkrove nëpër male .....	8
Çaste nga ditari i një partizani poet .....	9
Balladë për ditëlindjen .....	12
Nji ditë e largët nandori .....	14

II.

Buzëqeshje në shtërgatë .....	19
Rapsodi e maleve tona .....	21
Tufane që përlajnë errësinën .....	24

III.

Kur linda unë .....	29
Poema e buzëqeshjes që nuk vdes kurrë .....	31
Me kangë të freskët malesh legjendare .....	34

IV.

Trandafil i kuq mbi shkamb .....	41
Te pylli i shekujve .....	51
Nga ajo kangë, si varg kryengritës, dole ti .....	61